




ԼՈՒՐԵՐ ԻՐԱՔԻ ՀԱՅՈՑ ԹԵՄԻՑ

ՔԱՀԱՆԱՅԱԿԱՆ ՉԵՌՆԱԴՐՈՒԹՅՈՒՆ ԵՎ
ՕՇՈՒՄ

Մարտի 1-ին, հինգշաբթի օրը, «Սրբոց Վարդանանց պորավարաց» տոնին, Իրաքի հայոց Ս. Գրիգոր Լուսավորիչ եկեղեցու մեջ Իրաքի հայոց թեմի առաջնորդ Ս. Ավագ եպիսկոպոս Ասատուրյանը հանդիսավոր ս. պատարագի ընթացքում քահանայական ձեռնադրության և օծման կարգ է շնորհել բարեջնորհ Արմեն սարկավագ Իշխանյանին:

Փետրվարի 29-ին, չորեքշաբթի օրը, երեկոյան, Վարդանանց տոնի նախատոնակի ավարտին, կատարվել է «կոչումն քահանայության» արարողությունը՝ համաձայն ձեռնադրության Մաշտոցի:

Նորընծայի կոչման կարգը կատարել է Ս. Ավագ եպիսկոպոսը՝ խարտավիակությամբ Ս. Զավեն քին. Փոլատյանի:

Հինգշաբթի օրը, Վարդանանց տոնին, երեկոյան ժամը 17-ին, Բաղդադի հայոց Ս. Գրիգոր Լուսավորիչ եկեղեցում պատարագ է մատուցել Ս. Ավագ եպ. Ասատուրյանը: «Ձի ողորմած և մարդասեր ես Աստուած» աղոթքից առաջ սրբապան հայրը քահանայական ձեռնադրություն և օծում է շնորհել Արմեն սրկ. Իշխանյանին՝ վերանվանելով նրան Ս. Նարեկ քահանա:

Ձեռնադրության և օծման արարողությունից հետո սրբապան հայրը իր հոգեշունչ քարոզով ոգեկոչել է Վարդանանց հիշատակը,

ապա անդրադարձել պատրաստված հոգևորականների անհրաժեշտությանը մեր Եկեղեցու անդաստանում:

Այս տարի Վարդանանց քաջամարտիկների տոնը իրաքահայության համար իրապես դարձել է աննախընթաց ցնծության օր: Երկար տարիներ է, ինչ իրաքահայ թեմում չէր կատարվել քահանայական ձեռնադրության և օծման կարգ:

ՄԱՅՐ ԱԹՈՒԻ ՄԻԱԲԱՆ Ս. ՀՈՎՆԱՆ
ԱԲԵՂԱ ՏԵՐՏԵՐՅԱՆԻ ԱՅՑԸ ԻՐԱՔԻ
ՀԱՅՈՑ ԹԵՄ

Սույն թվականի ապրիլի 15-ին, Իրաքի հայոց թեմի առաջնորդ Ս. Ավագ եպ. Ասատուրյանի և թեմի Ազգային եկեղեցական իշխանության հրավերով, Մայր Աթոռ Ս. Էջմիածնի միաբան Ս. Հովնան աբեղա Տերտերյանը այցելում է Իրաքի հայոց թեմ մասնակցելու պատկական տոներին:

Ս. Հովնան աբեղա Տերտերյանը իր հետ տարել էր նաև Ամենայն Հայոց կաթողիկոս Ն. Ս. Օ. Ս. Ս. Վազգեն Ա Վեհափառ Հայրապետի սրբատառ կոնդակը՝ ի հաստատություն թեմի առաջնորդ Ս. Ավագ եպիսկոպոսի վերընտրության:

Ս. Հովնան աբեղա Տերտերյանը, օծված լինելով լավ ձայնով և եկեղեցական-ծիսական հարուստ գիտելիքներով, իր գործուն մասնակցությունն է բերում Ավագ շաբաթի տո-

նակատարություններին: Հայր սուրբը ապրիլի 21-ին մատուցում է ճրագալույցի ս. պատարագ և քարոզում «Այսօր և հրեշտակք յերկնից իջեալ տան աւետիս մարդկան եթէ յարեաւ խաչեալն և յարոյց զձեզ ընդ ինքեան» (շարական) բնաբանով: Այնուհետև նա կարդում է Վեհափառ Հայրապետի օրհնության գիրը՝ Ս. Հարության տոնի առթիվ, ուղղված սրբազան հորը, թեմի ազգային եկեղեցական իշխանությանը և իրաքահայ ժողովրդին:

Հոգեջնորի Ս. Հովնան արեղա Տերտերյանը ս. պատարագ է մատուցում նաև ապրիլի 24-ին, հայ բյուրավոր նահատակաց հիշատակին:

Պատարագից հետո գործադրվում է Եղեռնին նվիրված գեղարվեստական մի ծրագիր, որի ավարտին փակման խոսքով հանդես է գալիս թեմի բարեխնամ առաջնորդ Ս. Ավագ եպս. Ասատուրյանը:

Մայիսի 9-ին Ս. Հովնան արեղա Տերտերյանը լավագույն տպավորություններով վերադառնում է Մայր Աթոռ:

